

LEON, DIT L'ARMENIEN

Empereur d'Orient.

*Après auoir acquis vne immortelle estime,
Dans un sanglant combat où Mars eut pû perir,
A un traistre inhumain ie seruis de victime
Pour auoir differé de le faire mourir.*

813.
Zonare.
Eguace.

DE tous les vices il n'y en a point de si contraire à la vertu, & qui obscurcisse plus les belles actions que l'impieté; en effet si Leon n'auoit point esté impie à l'endroit des saintes Images, contre lesquelles il fit mille impietez, on le pourroit mettre au rang des plus grands Empereurs & des plus renommez Capitaines. Il estoit fils du Patrice Pardus aussitost que l'armée l'eut élu Empereur, il vsa des mesmes diligences dont auoient vsé ses Predecesseurs à l'égard de Charlemagne qui luy accorda la paix; ensuite il fit fortifier la ville de Constantinople, qui fut quelque temps après assiegée par les Bulgares, sous la conduite de leur Roy Crumne, qui vint jusqu'aux portes de


CVII. EMPEREUR. 19

la Ville par bravade, dont Leon Prince vaillant & courageux, se sentant indigné, sortit de la Ville, après auoir mis son armée dans l'ordre requis pour combattre. Ce que voyant Crumne, encore tout joyeux de la victoire qu'il auoit obtenuë sur l'Empereur Michel, l'attendit avec resolution de le vaincre ou de mourir; l'alarme estant sonnée de part & d'autre, ils en vinrent aux mains, mais leur sort fut bien different; car après que les deux partis eurent soustenu vn tres-aspre combat, qui dura autant que la journée, Leon & Crumne s'estant rencontrez au milieu de la meslée, se receurent à beaux coups de lances, lesquelles estant brisées, ils tacherent par le glaiue de s'arracher la vie. Leur combat fut long & tres-opiniastre; car si Leon assailloit bien, Crumne se défendoit de mesme, si bien qu'il estoit difficile de juger qui des deux seroit vaincu, ou vainqueur; neantmoins Leon s'estant leué sur les arçons, luy donna vn si grand coup d'estramaçon sur la teste, qu'il le renuerla roide mort sur la place. Ce coup fut leur arbitre, &

20 LEON DIT L'ARMENIEN

celuy qui ad judgea le gain de la victoire à Leon : car les Bulgares ayant veu leur Roy sur le sable, mirent leur salut en la fuite, laissant Leon possesseur de leur camp & d'une tranquille paix. Cette victoire le rendit si orgueilleux, qu'aussi-tost qu'il fut revenu à Constantinople, il se declara ennemy des saintes Images : il bannit S. Nicephore Patriarche de Constantinople, pour avoir voulu prendre leur defense ; ce qui fut cause que le Pape l'excommunia avec tous les autres Iconomaques, recevant à Rome tous les Grecs qui avoient esté bannis pour ce sujet. Enfin s'estant rendu insupportable à cause de ses impietez, il fut massacré par ses propres subjets : mais ce fut par vne rencontre assez remarquable. La veille de Noël ayant resolu de faire mourir Michel le Begue criminel de leze-Majesté, il en differa la mort à la priere de l'Imperatrice ; la nuit suivante qui estoit celle de Noël, Michel s'estant sauué de la prison par l'intelligence du geolier, assembla plusieurs de ses amis, lesquels s'estans déguisez en moynes, furent tuer Leon, qui pour

lors chantoit au chœur avec ses musiciens ; ce qui arriva après qu'il eut gouverné l'Empire sept ans, cinq mois & quatorze iours, l'an 820.



LOUIS LE DEBONNAIRE
Empereur d'Occident.

Par l'entremise de Lothaire,

Je me vis par deux fois dépossédé de l'Etat:

Mais mon temperament facile & debonnaire

Fut cause de cét attentat.

Ainsi que Charlemagne s'estoit acquis ce nom par ses belles actions, son fils Louis fut surnommé le Debonnaire à cause de sa pieté, bonté & courtoisie. Il eut pour mere Hildegarde fille du Duc des Seues, il espousa en premieres nopces Irmengarde, de laquelle il eut trois fils, Lothaire, Pepin & Louis; après la mort de sa premiere femme il espousa Iudith, qui fut mere de Charles, surnommé le Chauue, qui luy succeda à la Couronne de France. Aussi - tost que son pere eust rendu l'esprit, il se transporta à Aix,

814.
Sigebert,
Anno, 807.
lateran,
Adressal,
Regino,
Aimo-
nius.